

Naalakkersuisooqatigiit isumaqatigiissutaat naapertorlugu Kujataani Itilliarisup N 60.614 W45.46.622 ikerasaliorneqarnissaanik Naalakkersuisut suliniuteqarnissaannik peqquneqassasut Inatsisartut aalajangiiffissaattut siunnersuut
(*Saqq.: Inatsisartunut ilaasortaq Kelly Berthelsen, Inuit Ataqatigiit*)

pillugu

Sanaartornermut ataatsimiititaliap

ISUMALIUTISSIISSUTAA

Siunnersuutip aappassaaneerpeqarneranut tunniunneqartoq

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Bendt B. Kristiansen, Inuit Ataqatigiit, siulittaasoq
Inatsisartunut ilaasortaq Jens-Erik Kirkegaard, Siumut, siulittaasup tullia
Inatsisartunut ilaasortaq Anders Olsen, Siumut
Inatsisartunut ilaasortaq Jess Svane, Siumut
Inatsisartunut ilaasortaq Villy Olsvig, Inuit Ataqatigiit

UPA 2017-ip nalaani ull. 8. maj siullermeerereernermi Ataatsimiititaliap siunnersuut misissorpaa.

Siunnersuutip imaa aamma siunertaa

Siunnersuuteqarnikkut kujataani sumiiffimmi taaneqartumi ikerasalianik pilersitsinissamik Naalakkersuisut peqquneqassapput.

Siunnersuutip Inatsisartunit siullermeerneqarnera

Imaani isumanaallisaanerunissaq naalakkersuinikkut tapersersornartinneqarpoq, tamatumanilu ikerasaliat imaatigut angalanermi isumannaallisaanerup pitsaanerulersinnaaneranut aqqutissiuutaasinnaapput.

Isummernernut atatillugu Naalakkersuisut allannguutissatut siunnersuut imaattoq saqqummiuppaat:

”Naalakkersuisut Kalaallit Nunaanni ikerasalianik, imarsiortunut atorneqartussanik pisariaqartitsineq pillugu nassuiaammik saqqummiusseqqullugit

pequneqarnissaannik Inatsisartuni aalajangiiffigisassatut siunnersuut. Nassuiaat kommunit suleqatigalugit suliarineqassaaq, tassanilu najukkani pisariaqartitat, piffissamut avatangiisinut sunniutissanik naliliinernik suliaqarnissamut atugassamut missingiutit imaluunniit avatangiisinut pinngortitamullu sunniutissanik allanik misissueqqissaarnerit, kiisalu aningaasaqarnermut missingersuutit piffissamullu pilersaarutit tamarmiusut nassuiaasiorneqassapput. Nassuiaat 2018-imi Inatsisartut upernaakkut ataatsimiinneranni agguaassinissaq siunertaralugu suliarineqassaaq.”

Siunnersuutip aamma allannguutissatut siunnersuutip Sanaartornermut ataatsimiititaliami misissorneqarnissaa tamatuma kingorna naalackersuinikkut kissaatigineqarpoq.

Siunnersuutip ataatsimiititaliamit misissorneqarnera

Siunnersuut ataatsimiititaliap misissorpaa.

Ataatsimiititaliap maluginiarpaa, suliniut pillugu 1990-ikkunni misissuisoqarnikuusoq, tassanilu siunnersuutip ingerlanneqarnissaanut 1990-ikkunni akiusut tunngavigalugit akissaajaatit 7 mio. kr.-t missaaniissasut.

Sanaartornermut ataatsimiititaliattaq maluginiarpaa, ikerasaliortitsinermit siunissami pingaarnersuinerit aningaasalersuinerillu Naalackersuisunit siunnersuutigineqartutut misissuinerit nutaat tunngavigalugit tulleriiaarisooqarumaartoq.

Ataatsimiititaliap maluginiarpaa, Inatsisartut ataatsimiittarfimmi isumaqatigiinniarnersa nalaani nuna tamakkerlugu sumiiffinni arlalinni ikerasaliortoqarsinnaanera periarfissaasoq taaneqartoq, ikerasaliallu taakku atonerini angalasunut piffissaq sivikinnerusoq atorneqarsinnaasoq, angalanerup isumanaatsuunissaa isumannaarneqarsinnaasoq, ingerlatissamik/ikummatissamik atuineq sipaarfiusinnaasoq, taamaalillunilu avatangiisinut iluaqutaallutik.

Ataatsimiititaliap isummat taakku soqutiginantippai, isumaqarlunilu kommuninik oqaloqateqarnissani taakku tunngaviulluarsinnaasut, Naalackersuisuniillu siunnersuutigineqartutut suliap ingerlaqqinnerani taakku ilanngunneqartariaqartut.

Siunissami aalajangiinerit paasisaqarneq tunngavigalugu pisassasut Sanaartornermut ataatsimiititaliamit ilalernartinneqarpoq, immamilu angallattunut assartuussinermi akissaajaatit appariartortut kiisalu ikerasaliap piffissami atasinnaanerani naleqquttumik nalikilliliinermut piffissaq naatsorsuinermi ilanngunneqassasut ataatsimiititaliap kaammattuutigaa.

Siunnersuutip aningaasatigut kingunissai

Siunnersuutip tunngavilersuutitaani aalajangiiffigisassatut siunnersuutip piviusunngornerani aningaasatigut allaffissornikkullu kingunissai allaaserineqassasut Inatsisartut Suleriaasianni § 33, imm. 1-imi allassimavoq.

Ataatsimiititaliap paasivaa, tamanna naapertorlugu siunnersuutip piviusunngornerani aningaasatigut kingunissai missingerneqarlutik taaneqarsimasut.

Aningaasatigut kingunissai pillugit Naalakkersuisut ima allapput:


”Itilliarsummi ikerasaliorsinnaanermut aningaasartuutissanik Naalakkersuisut maannakkut missingiisinnaanngillat. Naalakkersuisut taamaamat inassuteqaatigaat aalajangiiffigisassatut siunnersuut allanngortinneqassasoq, taamaalilluni annertunerpaamik ilisimasaqarluni aalajangiisinnaajumalluni pisariaqartunik misissuinissamik Naalakkersuisut peqquneqassasut. Aalajangiiffigisassatut siunnersuummi tunngavilersuutini allaqqavoq 1990-ikkunni naatsorsuisoqarsimasoq. Naatsorsuinerit pissarsiarineqartariaqarput, piviusorsiorlumillu suliarineqarsimanersut ullutsinnilu immakkut angallannermut piumasaqaatinut naleqqunnersut nalilersorneqarlutik. Taamaaliornikkut aalajangiinissamut tunngavissaq tamakkiisoq suliarineqarsinnaassaaq, tassani pingaartumik aningaasanut tunngasut isumannaallisaaernerlu nalilersorneqassallutik.”

Sanaartornermut ataatsimiititaliap taarusuppa, ersarissumik taaneqarsimanngikkaluartoq tassunga ilaasariaqartoq aningaasaliissutitut sinaakkusiussanit atuuttunit missingersuutitullu tunngaviliussanit misissueqqissaarnerup naammassinissaa taamaalilluni Naalakkersuisunit ingerlanneqassasoq.

Ataatsimiititaliap inassutai

Tamanna tunngavigalugu Naalakkersuisut allannguutissatut siunnersuutaata akuerineqarnissaa ataatsimiititaliap isumaqatigiittup inassutigaa.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.




Bendt B. Kristiansen,
Siulittaasoq

11. maj 2017


UPA 2017/051



Jens-Erik Kirkegaard,
Siulittaasup tullia



Jess Svane



Anders Olsen



Villy Olsvig